

Iwwer su Seilbohne

Gessdern hott misch de Schorsch gons uffgereeschd oogerufe: Honnes, hosde dess gelese, in Offebach unn aach in Fronkfort solle Seilbohne gebaut werrn. Hosde dess gelese?

Ei ja, habb isch ze Antwort gewwe, unn nitt nor in Offebach unn Fronkfort, naa, iwwerall dun die Owwerbeiemosder vunn de Städte driwwer noochdenke, wie se den Audoverkehr wenischer mache kenne. Unn doo moonese halt, dess kennt mett Seilbohne gemachd werrn, die außerdem vill billischer sinn als die U-Bohne mett dere gonse Buddelei unner de Heiser.

Honnes, seet de Schorsch, du waaßt doch sicher, warum isch su uffgereeschd bin?

Ei no klar, gebb isch ze Antwort, weil du schunn vor e paar Johr die Idee gehabbd host, dass in Flerschem su e Seilbohn gebaut werrd, odder?

De Schorsch druff: Ja, isch hadd joo schunn zwaadausenddreizeh die Idee unn du host se im Flerschemer Blättche beschriwwe, dass Flerschem su e Seilbohn baue soll vunn de Parkplätz unne omm Moo iwwer de Norma-Parkplatz bis onn die Kolonnade unn dass doodeferr drei Terrm gebaut sollte werrn. Unn wie merr doomols driwwer gebabbd hawwe hott de Karl gesaad, dess deet e Attraktion gewwe, doo deede die Leit vunn Fronkfort unn vunn Wissbade unn heit deet isch saache aach vunn China hierher kumme unn deede sisch dess oogugge unn deede aach mett de Seilbohn fahrn, unn e bissi späder deet Flerschem dorsch su e Bohn in de gons Welt bekonnd werrn.

Isch habbem zugestimmd: Jetzt kennt unsern neie Beiemoosder die Idee uffgreife unn mett emm Investor redde, in unserne Stadt ze invesdiern. Weils donn nitt nor haaße dut, Flerschem, dess iss die Stadt mett Fluuchlärm, naa, dess iss die Stadt meddere Seilbohn, unn werklisch, dess kennt donn aach noch onnern Städte hier in de Näh druff uffmerksam mache, dass die Zukunft vumm städtische Verkehr in de Luft leihe dut.

Isch habb gegrint. Waaßde Schorsch, die Idee iss gut, awwer grad in de Städte werrd schunn driwwer dischpedierd, ob nitt mett su ooner Seilbohn iwwer die Heiser die Persönlichkeitsrechte verletzt werrn, weil wenn die Bohn iwwer die Heiser leeft, merr joo aus emm Fensder uff die Flachdächer unn die Balkone unn in die Hinnerhöf gugge kann. Unn alles werrd joo heitzedaach meddem Händy fotografiert unn ins Internet gestellt unn doo konns soi, dass de Nochber kimmt unn seet, gessdern host du unn doi Fraa ohne Hose uff eiem Balkon gesotze. Gugg derrs oo unner www.ohnehose.de.

Doo moont de Schorsch: Doo derrft merr halt in die Kabin koo Fensder enoimache.

Isch habb de Kobb geschiddeld. Schorsch, wer werrd sich donn in su e Blechbix enoimache, wo merr nitt enausgugge kann, naa, dess misst onnersders gemacht werrn, awwer wie?

Doo seet de Schorsch: Merr kennt joo enn Fernsehatterat in die Kabin enoi mache unn Bilder zeische vunn de Zuuchspitz unn jeden Daach vunn emm onnern Berrsch, moonsde nitt? Unn wer erkenne dut was ferrn Berrsch dess iss, der dut ebbes gewinne. Schorsch, saach isch, dess meddem Fernsehatterat sollt merr dene Seilbohnbauer mol schreiwe. Awwer merr kann werklisch gesponnd soi, wie dess weidergieht mett dene Seilbohne, aach mett de Seilbohn in Flerschem.

Eiern Honnes